



Mette Arqe-Hammeken
Inatsisartunut ilaasortaq, Naleraq

§ 37 naapertorlugu apeqquteqaat nr. 068/2026-mut akissuteqaat – nunatsinni illoqarfiit, nunaqarfiit inoqarfiillu ilanngullugit paasisutissiineq pillugu.

05-05-2026
Suliap nr. 2026 - 3567
Akt nr. 26433817

Postboks 1029
3900 Nuuk

Oqa: +299 34 50 00
Email: ikin@nanoq.gl
www.nanoq.gl

Asasara Mette Arqe-Hammeken

Inatsisartut suleriaasiat naapertorlugu apeqquteqaatinnut qujanaq. Ataani akissavakkit.

- 1. Kalaallit nunatsinni illoqarfikkaarlugit, nunaqarfikkaarlugit, piffiit piffikullu inoqarfiit inoqarfiusimasullu tamakkerlugit illoqarfiit nunaqarfiillu inuerunnikut matunikut ilanngullugit oqaluttuassartaat immikkuutitaarlugit atuagaaranngorlugit/paasisutissaarannguanngorlugilluunniit meeqqat atuariinut ilinniartefarfinnullu atorsinnaangorlugit pilersinneqarnissaat tamaat naammassillugit qanoq akeqassappat??**

Akissut: Apeqqutivit nassatarisai arlaqarmata akiniarnera imaannaangilaq, taamaattumik suliamut killiliineq aamma qaffasissusiliineq apeqqutaatillugu katillugit aningaasartuutissat annertussusilerneqarsinnaapput.

Sumiiffiit allaatigineqartussat amerlassusii apeqqutaatillugit, oqaluttuarisaaneq qanoq sukumiitigisumik saqqummiunneqassanersoq, oqaatsinik atorineqartussanik toqqaanissaq (kalaallit oqaasii, qallunaat oqaasii aamma immaqa tuluit oqaasii), kiisalu allaatigisat suliarineqartussat naqitanngortinneqassanersut, digitalinngortinneqassanersut imaluunniit taaneqartut tamaasa atorlugit suliarineqassanersut apeqqutaatillugu aningaasartuuteqartoqassaaq. Taassuma saniatigut sumiiffiit oqaluttuarisaanerannut ilisimasalinnik suliamullu paasisimasalinnik peqataatitsineq pitsaassutsimut isumalluutinillu atuinerneq sunniuteqassaaq.

Aaqqissuinnikkut ilikkartitseriaatsitigullu suliaqaqqinnissaq ilinniusernermut tunngaviussaaq, imarisaasorlu atuartut killiffiinut ilikkagassatullu anguniagassanut naleqqussarneqassalluni. Pitsaassuseq atuartitsinermilu atorineqarsinnaassuseq qulakkeerniarlugu paasisimasallit suleqatigalugit anguniakkat, imarisaq sammisassallu erseqqissumik ataqatigiissillugit perorsaariaatsini tunngavinnut aaqqissuunnerisigut ilaatigut ilinniusiap aaqqissuunneqarnissaanik kinguneqassaaq.

Tamanna tunngavigalugu suliassat aaqqissuunniarneqartoq isumaluutinik annertuunik nassataqartussaassasoq Naalakkersuisut nalilerpaat – apeqqutaatillugu suliassaq qanoq annertutigitinniarneqarnersoq - aningaasaqarnikkut annertuumik pingaarnersiunerneq nassataqassaaq.

Misilittakkat aamma siusinnerusukkut ilinniusiat tunngavigalugit siunissamut takorluukkat pingasut aallaavigalugit Ilinniartitaanermut Aqutsisoqarfimmiittoq Ilinniarsiorfik naatsorsuivoq.

Allattarfinni nivingatillugit takusassiat, atuakkat paasissutissanik imaqartut aamma ilinniusiat digitaliusut sanaartorneqarnerannut naatsorsuinernut aallaaviupput – isumassarsiamiit piviusunngortitsineranut. Naatsorsuinermit aningaasartuutissat ilanngunneqarput: atuakkiortut akissarsiaat, piffissaq aaqqissuisup atugassaa, nutserineq, assiliartalersuineq, assinik pisineq, naqitigassanik aaqqissuilluni ilioqqaaneq, kukkunersuineq, paasisimasallit pitsaassusermik qulakkeerinninnerat, naqiterisitsineq Nuummullu assartuineq. Kingornatigut Nuummit illoqarfinnut nunaqarfinnullu il.il. assartuineranut aningaasartuutissat ilanngunneqanngillat.

Siunissamut takorluuqaq 1: Allattarfinni nivingatillugit takusassiat A2-mik angissuseqartut, paasissutissanik aamma illoqarfimmut, nunaqarfimmut inoqarfimmulluunniit oqaluttuarisaanermut imaqartut. Taanna takorluuqaq minnerpaanik 13 mio. kr.-nik naleqassangatinneqarpoq.

Siunissamut takorluuqaq 2: Nunap immikkoortuata paasissutissartaanik oqaluttuassartaanillu imaqartut atuakkiat (illoqarfimmut ataatsimut atuagaq ataaseq taassumalu eqqaamiui nunaqarfiit inoqarfiillu eqqarsaatigineqarput). Ilinniusiorfiup misilittagai naapertorlugit saqqummersitaq 30-nik qupperneqartoq manngertumillu ungalulik 120.000 kr.-nik akeqartarpoq.

Siunissamut takorluuqaq 3: Siunissamut takorluuqaq 1-imut aamma 2-mut tapertaasinnaasumik app-imik inerisaaneruvoq.

Atuarfimmi, ilinniartinnit aamma innuttaasuni ingerlatitseqqiinermit atuinermilu atuagassamik app-imik ineriaanermik siunissamut takorluukkat pingajuat imaqarpoq.

App-ip atorsinnaassusia teknikkikkullu katitigaanera aningaasaqarnermut kingunerisassanut pingaruteqassaaq. Tamakku apeqqutaatillugit app-imik inerisaaneq 300.000 kr.-nit 1.500.000 kr.-nut akeqarsinnaavoq.

Nunatsinni illoqarfinnut aamma nunaqarfinnut, soorlu saqqummersitat ilisimatusarnermi paasissutissat annertuut [Trap Grønland](#)-imeersut maannakkut taassuma saniatigut pigineqarmata oqaatigineqassaaq, tassanilu maannakkut siusinnerusukkullu inoqarfiit ilanngunneqarsimapput. Pineqartumut katersukkat [Kalaallit Nunaanni Katersugaasiviit](#) aamma [Nunatta Atuagaateqarfia](#)-ta aamma toqqortarai. Kiisalu Ilinniartitaanermut Aqutsisoqarfimmiittumi Ilinniusiorfimmi meeqqat atuariannut ilinniusiat arlaqartut saqqummersinneqarnikuupput, tassani nunatsinni nunalerineq, kulturi oqaluttuarisaanerlu atuartitsinermit atorneqarsinnaasutut ilaapput.

Inussiarnersumik inuulluaqqusillunga



Nivi Olsen